

## **Qeqqata Kommuniani Hudson Resources-ip tusarniaalluni ataatsimiititsineranut oqalugiaat**

(Vittus Qujaukitsoq)

Asasakka innuttaasut aamma ikinngutit

Ullumi Kalaallit Nunaanni aatsitassarsiorfinnut suliassat siuarsimanerpaat ilaat tusagaqarfigilaassallugu tamaanga aggernissassinnut piffissaqarsimagassi nuannaarutigaara. Qaqortorsuarmi aatsitassarsiorfissaq, ilanngullugillu suliffissaasinnaasut isertitassaasinnaasullu aatsitassarsiorfiup Kalaallit Nunaanni pilersissinnaasai pillugit paasissutissat, pillugit soqutiginartorpassuarnik ullumi tusagaqassasusi neriunarpoq. Neriuppunga apeqqutissarpassuaqartusi, taakkualu uagut ingerlatseqatigiiffiullu sapinngisatsinnik pitsaanerpaamik akiniarsarissavagut.

Hudson Resources ukiorpassuarni Kalaallit Nunaanni aatsitassarsiorluni misissuineramik ingerlataqarpoq. Taamaattumik aamma unnuppassuit Kalaallit Nunaanni pinngortitamiissimapput aammalu umimmaat nannullu qanimut misigisimallugit. Allaammi Namminersornerullutik Oqartussat aammalu Namminersorlutik Oqartussat ataanni sulillutik misigisimavaat. Taakkua nunaqavissuunngikkaluarluni nunaqavissuulernissamut qanillinerpaajussagaanni misigisariaqarput.

Hudson Resources Kalaallit Nunaanni diamantisorluni aammalu aatsitassanik qaqutigoortunik misissuisimavoq aammalu naggataatigut aatsitassamik Anorthosit-imik, glasfiberinik E-glas-inngorlugit tunisassiornermut atorneqartussamik, piiaanissamut akuersissummik qinnuteqaateqarluni.

Nuannaarutigaara maannakkut atuakkami quppernerup tullianut qupperinnaaleratta aammalu siunissami Hudson, aatsitassarsiorluni misissuinermut ingerlatseqatigiiffittut pikkorissutuinnaanngitsoq, kisiannili aamma aatsitassarsiorfiutileqatigiiffittut pikkorissutut taasinnaalissagipput neriunarluni.

Aasamut kingusinnerusukkut canadamiut ingerlatseqatigiiffiat alla Qeqertarsuatsiaat eqqaanni rubininik aamma safir-inik piiaalluni aallartittussaavoq. Naatsorsuutigilluinnarpara Hudson Resources-ip Qaqortorsuarmi suliassaa, Kalaallit Nunaanni aatsitassarsiorfinni nutaani tulleriiartuni suliassani tullinnguutissasoq.

Kalaallit Nunaanni aatsitassarsiorfinnut suliassanit allanit misilittakkavut, aamma suliassami tassani eqeersimaartumik atussavagut.

Nalunaarusiat assigiinngitsut maannakkorpiaq tusarniaassutigineqartut aammalu assilineranik ilissi arlassi peqarfigeriigaat, tassaapput suliassaq qanoq aallartinniarnarlugu ingerlatseqatigiiffiup siunnersuutaat. Tusarniaaneq manna aammalu tusarniaalluni ataatsimiititsinerit aaqqissuunneqartut, ilaatigut ilissi suliassanut isumassi oqariartuutigerusutassilu tusarnissaannut atorneqassapput. Assersuutigalugu eqqumiigisaqarussi, aammalu suliassami pissutsit ilai qanoq iliorneqarsinnaanersut siunnersuutissaqarussi oqaaseqaatissaqarussilu, taakkua tusarusuppavut.

Kisianni suliassami qanoq akuutinneqarsinnaanissassinut, atorfinitsinneqarnikkut imaluunniit sullississutinik pilersuisutut, kissaatsi siunnersuutisilu tusassallugit uannut taamatut aamma pingaaruteqartigivoq. Immersuinerit taakkua IBA-mut isumaqatigiissuteqarnissamut isumaqatiginninniarnarit ingerlaqqinneranni uannut pingaaruteqarput. Taanna isumaqatigiissutaavoq, pingaartumik najukkami suliffissat amerlassusissaannut, najukkami pilersuinissamut aamma ilinniartitaanermut piginnaanngorsaanerimullu suliniuteqarnissamut tunngatillugu siunnerfinnik aalajangersimasunik naammassinninnissamut ingerlatseqatigiiffimmut sukumiisumik pisussaaffiliisoq. Aamma aningaasaateqarfinnik pilersitsisoqarsinnaavoq, taakkualu siunertanut assigiinngitsunut aningaasassanik qinnuteqarfigineqarsinnaassallutik.

Apeqqutit avatangiisinut tunngassuteqartut Pinngortitamut, Avatangiisinut Inatsisinillu Atuutsitsinerimut Naalakkersuisup, aamma ullumi peqataasup, ataaniipput. Uanga aammalu Inuussutissarsiornermut, Suliffeqarnermut Niuernermullu Naalakkersuisoqarfinga inuiaqatigiit aningaasaqarnerannut tunnganerusunut akisussaasuuvugut, tassa imaappoq suliffissat aamma ilinniartut sungiusarfissaat qassit suliassamik akuersissuteqarnitsinni pissarsiarissanerivut aammalu pilersuinerit qanoq amerlatigisut suliffeqarfinnut najukkaneersunut suliakkiissutigineqassanersut aammalu apeqqutit taakkununga assingusut. Isumaqatigiissut ingerlatseqatigiiffimmit, Namminersorlutik Oqartussanit aamma kommunimit isumaqatigiissutigineqassaaq.

Naalakkersuisuniit suliassap matuma najukkami inuiaqatigiinnut iluaqutaanissaa angorusuttorujussuarput. Taamaattumik ingerlatseqatigiiffik inunnik

piukkunnartunik Kalaallit Nunaanni suliffeqarnermi ujarlerlutik  
ilungersortariaqarpoq. Peqatigisaanik inuit eqqortut suliffeqalernissamut  
piareersimatilernissaasa taamaalillutillu suliassami sulilernissamut  
piareersimanissaasa qulakkeernissaat oqartussaasuniit aamma najukkami  
oqartussaasut tungaanniit pisussaaffigaarput. Taamaattumik kikkut tamaasa  
kaammattorusuppakka suliap ingerlanerani tassani siulliullutik iliuuseqaqqullugit  
aammalu maligassiuilluarnermik takutitsillutik siulliuniaqqullugit.

Naggataatigut oqaannarsinnaavunga ataatsimiilluarisi aammalu neriuppunga ilissi  
tungissinniit immersorneqarluarluta eqeersimaartumik oqallisissasugut.

Qujanaq